

MENGETI HARI IBU

22 Desember 24

I. DHANDANGGULA

1. Puluhan tahun kang wus kawuri
akeh ingkang wus padha uninga
wolulikul tumanggale
Oktober sasi iku
sewu sangang atus kang warsi
wolulikul punjulnya
titi wanci iku
aneng bumi Nuswantara
dumadine sejarah ingkang wigati
yeku Sumpah Pemuda
2. Duk nalik semana kapyarsi
lagu Indonesia Raya nama
kasil denkumandhangake
anggugah gregetipun
pra ibu kang mangka pangarsi
myang pakumpulanira
pra wanita iku
timbul kreteg kang utama
manunggalake neng wadhah kang mandhiri
mligi kanggo wanita
3. Awit rikala iku sayekti
pakumpulane para wanita
makasih dadi perangane
myang kumpulane iku
pra pemudha iku kaeksi
mulane darbe angka
pangarsane iku
arsa ndhapuk pakumpulan
mligi wanita amrih bisa mandhiri
sadrajad lan pra priya
4. Nora kendhat nggonira ambudi
tutunggulira para wanita
nggone padha menggalihke
mrih kasembadan tuhu
pakumpulan iku sayekti
ngadeg kanthi sembada
lahir batin iku
mangka kumpulan wanita
bisa dadi organisasi mandhiri
sang sinom sru kiprahnya

II. SINOM

1. Yekti aneng saterusnya
awit saka drenging ati
para wanita pejawang
kamardikan bangsa neki
gembleng tekadireki
golang-gilig wus sarembug
arsa ngadani kridha
konggres mligi para putri
kanthi greged murih bisa kaleksanan
2. Neng kutha Ngayogyakarta
bisa kalakon kaeksi
katitimangsa ing tanggal
kang kaping rolikur nganti
tanggal selawe nenggih
Desember sasine iku
Sanglas wolulukur
Prastawa gati dumadi
Yeku kongres wanita kang sepisanan
3. Sawijining kaputusan
akaryaorganisasi
federasi wujudira
kang satuhu amandhiri
kanthi tinengeran nami
dadi kawentar ing mbesuk
Prikatan Pakumpulan
Perempuan ingkang mligi
Wanita Indonesia iku sanyata
4. Kalawan ugi ingaran
PPPI Kang wewangi
iku kang tuhu minangka
srana kanggo pangiketing
gregeting juwang neki
para wanita sadarum
bebarengan lan priya
amarsudi myang undhaking
harkat lan martabat bangsa Indonesia
5. Aneng tahun kang lumakya
sewu sangang atus luwih
sangalikulur iku nyata
PPPI kang wewangi
Namanira ginanti
Kanglumrah iku sinebut
Yaiku Perikatan
Perkumpulan Istri mligi
Indonesia PPPI yen cinekak
6. Aneng sajeroning warsa
sewu sangang atus neki
luwih telung puluh lima
pan satuhu denadani
konggres wanita kadwi
dene mapane puniku
aneng kutha Jakarta
ing kngres iku sayekti
ngasilake kaputusan kang prayoga
7. Kaputusan kang sepisan
nggawe Badan onggres nenggih
Perempuan Indonesia
sarta netepake yekti
jebibahan utami
laras lan kodrate iku
wanita Indonesia
kanggo pakurmataneki
minangka ibu bangsa Indonesia
8. Kang ndarbeni jebibahan
cumithake generasi
kang satuhu wicaksana
sarta landhep olah pikir
mulang muruk tan keru
dimene ta eling iku
marang kandeling rasa
rumesep ing sanubari
rasaning rasa kabangsan Indonesia

9. Kongres kang kaping telunya
iku yekti denadani
Perempuan Indonesia
ngepasi ana ing warsi
etungane Masehi
tahun sewu sangang atus
telu wolu punjulnya
aneng Bandung mapaneki
nandhesake Lamun ing Desember candra
10. Ping rolikur tumanggalnya
wus padha densarujuki
minangka dina manjila
Hari Ibu denarani
Kang tansah denpengeti,
Sabèn tahun datan luntur
ing sakteruse nulyo
iku dikukuhake kanthi
Layang pikukuh Presiden Indonesia
11. Nomer tlung atus nembelas
dene ta tahunireki
siji sanga lima sanga
ing bab dina kang wigati
ri nasional neki
nanging dudu dina libur
apan uwis kalakyan
minangka ari wigati
den eling denpengeti nganti samangkye
12. Sewu sangang atus mplampah
papat nenem pan sayekti
PPPI salin nama
Konggres Wanita anami
Indonesia puniki
KOWANI cekakanipun,
nganti wektu samangkya
kadulu kiprahnya maksih
laras kalawan kamajuwaring jaman
13. Kadadegan kang tumingal
ing tanggal rolikur neki
sasi Desember sanyata
ana ing wektu samangkin
iku sayekti dadi
mangka pancadan satuhu
sejarah perjuwangan
Kesatuan kang sayekti
Pergerakan Perempuan Indonesia
14. HARI IBU dening bangsa
Indonesia denpengeti
tuhu ora mung minangka
mligi kanggo angurmati
myang lelabuhaneki
wanita minangka ibu
ananging iku uga
minangka pangaji-aji
amocung jasane putri Indonesia

III. POCUNG

1. Yen dinulu, mangka pakurmataneku
mring para wanita
ing sawutuhe sayekti
minangka garwa saera warganegara
2. Maliheku, uga myang kiprahnya iku
Lan uga minangka
warga masyarakat neki
tanapi abdining Gusti Kang Ma Kwasa
3. Kridhaneku, minangka pejuwang tuhu
Gayute kalawan
angrebut sarta angisi
Kamardikan trus pambangunaning bangsa
4. Jroning kalbu amengeti HARI IBU
iku darbe ancas
minangka suka pepeling
tumrap saguning kawula Indonesia
5. Luwih perlu, generasi mudhaneku
yeku myang maknanya
HARI IBU iku yekti
hari kebangkitan sarta uga kesatuan
6. Maknaneku, uga persatuan tuhu
myang perjuwangannya
para wanita puniki
iku perangan kang tan bisa pinisah
7. Iya iku, saka gung kiprahireku
perjuwangan bangsa
sayekti iku wigati
winarisan myang gregeting perjuwangan
8. Gunaneku, kanggo ngandelake kalbu
tekad kang utama
neruske perjuwangan neki
nuju masyarakat adil makmur nyata
9. Dhasareku, UUD pat lima tuhu
uga Pancasila
loro-lorone wigati
dimen gelis kasembadan kang sinedya
10. Gregetipun, ya perjuwangane iku
pra kaum wanita
Indonesia sayekti
Komot aneng lambang hari ibu nyata
11. Iya iku, mlathi lan kudhupe tuhu
minangka gambaran
tresna lan asih kodrati
ing antarane ibu kalawan putra
12. Liyaneku, iya ta ingkang awujud
kasucian uga
antarane ibu yekti
sarta pangrbanane putra sanyata
13. Iku wujud, iyeku kamitran tuhu
lan sakdrajad uga
ingkang perlu denwujud
ana ing sajroning urip tembayatan
14. Nora kantong, ana ing sajrone kalbu
nggone anindakna
marang jejibahaneki
lelumban aneng madyaning masyarakat
15. Wajib iku, anglakoni kanthi tuhu
kiprahing myang bangsa
sarta uga myang negari
dimen wutuh maju damai Indonesia

IV. KINANTHI

1. Kalihlikur tanggalipun
dene sasine ngepasi
ing Desember dhumawahnya
tahune ingkang Lumaris
sewu sangang atus nyata
wolulikur amunjuli
2. Dahat ing wigatinipun
kridha kang Lagya Lumaris
ing Kutha Ngayogyakarta
Konggres Wanita dumadi
nenggih ingkang kapisanan
perjuwangane pra putri
3. Kabeh wus padha sarujuk
pra wanita kang ngestreni
ana ing kongres kapisan
gumolong-gilig ing ati
kang arsa andhapuk sigra
swijining Organisasi
4. Kang mligi wargane iku
amung kanggo para putri
kang minangka kanggo wadhah
perjuwangane pra putri
marang hak-hake wanita
mardikaning bangsa ugi
5. Organisasine iku
kanggo pra wanita mligi
pan satuhu tinengeran
akanthi namanireki
Perikatan Perkumulan
Putri Indonesia neki
6. Inkang kalumrah sinebut
kanthi nami PPPI
iku minangka sarana
ingkang kanggo pangiketing
klawan greget perjuwangan
tan mungkur saka njro ati

V. GAMBUH

Sekar gambuh kang katur
mangka tandha pangajimring ibu
perjuwangane tan entheng yen kaeksi,
nggulowenthah marang sunu,
mrih dadya janma kinot.

Ing tanggal ping rolikur
ngepasi Desember wulanipun,
pra warga Indonesi-a ing saknagri,
sami amengeti tuhu,
hari ibu datan lowok.

Mangga sami nyenyuwun,
konjuk ngarsaning Gusti Hyang Agung,
mugi-mugi tansah kersa amaringi,
bekah lan nugrahani-Pun
mring Para ibu sayektos

VI. PANGKUR

1. Sekar pangkur kang kinarya
amahargya ri kang dahat wigati
kadadeyan kang kapungkur
tumraping bangsa kita
kongres pra wanita Indonesia tuhu
neng kutha Ngayogyakarta
kalakon kanthi prayogi
2. Wolulukur pasing tanggal
angleresi Desember kang sutengsi
tahun sewu sangang atus
wolulukur wewahnya
para wanita Indonesia kadulu
kumpul aneng Kutha Yogya
ngadani kongres sayekti
3. Golong-gilig tekadira
pra wanita kang padha angestreni
ing kongres wanita iku
wus gembleng tekadira
arsa ndhapuk organisasi satuhu
mangka wadhah perjuwangan
mligi kanggo para putri
4. Klakon gegayuhanira
ndhapuk organisasi kang mligi
wargane putri sadarum
anulya ingaranan
prikatan perkumpulan wanita tuhu
kanggo ngranggeh gegayuhan
myang hak-hake para putri
5. Ananging uga berjuwang
tembayatan lan pra pejuwang priya
mad-sinamadan sadarum
kupiya mbudidaya
nundhung penjajah
6. Sempulur nganti samangkya
Organisasi pra wanita neki
kongres kang kaloro tuhu
ngasilake putusan
ndhapuk Badan Kongres Perempuan iku
sarta suka pakurmatan
mring para ibu sayekti
7. Kang minangka ibu bangsa
sesanggeman datan gampang sayekti
tumrap pra wanita tuhu
kang wajib katindakna
dumadine generasi kang pinunjul
pinter sarta wicaksana
andhap asor luhur budi
8. Mulang muruk tan kalepyan
tata krama sarta budi pekerti
dimen eling jroning kalbu
ngolah lanheping rasa
niyang rasa kabangsan kang wajib rinabuk
amrih subur jroning nala
tresna mring bangsa lan nagri

VII. ASMARADANA

1. Aneng Desember sutengsi
kalihilikur tanggalira
iku dahat wigatine
tumrap bangsa Indonesia
den emut saben warsa
amengeti para Ibu
myang kiprahyo duk semono
2. Kala negari puniki
dereng antuk kamardikan
dahat sru budidayane
katinggal mad-sinamadan
kalawan para priya
datan kawon kridhanipun
lamun ta katandhing priya
3. Amburdi murih gampanging
nggennya sami sesambetan
pra wanita iku mangke
ngancagake pirembagan
pra wanita mupakat
lan ugi sami sarujuk
angadani pepanggihan
4. Dina tanggal lan sutengsi
sigra kadamel rancangan
saha tinetepken age
tuhu wus gembleng tekadnya
rolikur tanggalira
dumugi selawe tuhu
sasi Desember tuminggal
5. Kutha Yogya kang pimilih
iku mimangka nggo ajang
amapan parepatane
para wanita pejuwang
ngrembag mawarna-warna
gayut klawan kridhanipun
ngudi mardikaning bangsa
6. Swiji putusan dumadi
ing parepatan punika
ndhapuk organisasine
mligi kanggo pra wanita
mangka wadhahing kridha
para wanita punika
ngranggeh gagayuhanira

VIII. MIJIL

1. Laras lan pepenginaning ati
satuhu kalakon
domadose organisasine
PPPI punika anami
Wadhahe pra putri
Mrih jumbuh ginayuh
2. Arane kang PPPI
punika sayektos
Perikatan Perkumpulan kuwe
Perempuan Indonesia neki
wadhahe pra putri
berjuang satuhu
3. Perjuwangane orang mung mligi
kalamun tinoton
ra mung nggayuh komardikane
nanging gayutane myang kodrati
tumrap para putri
klawan uga ibu
4. Minangka ibu punika wajib
nggulawenthah yektos
dhateng pra putra katurunane
murih bisa dadi generarasi
wicaksana ugi
olah pikir unggul
5. Awit mangke pra mudha puniki
kang kedah anggantos
para sepuh ingkang sampun
lungse
kang mila sampun wancinireki
nglintirake yekti
mring pra mudhanipun
6. Ing pangajab mrih lumampah becik
kalamun katinon
sumambunge myang generasine
saking para wredha kang wis lingsir
mring pra mudha yekti
lumaksana mulus

IX. DURMA

1. Duk semana para wanita mupakat
padha arsa ngadani
kongres pra wanita
ing kutha Yogyakarta
wektu kang den sarujuki
dina lan tanggal
wus dipunrembag sami
2. Angepasi ping rolikur tumanggalnya
tekan selawe yekti
dene wulanira
satuhu wus rinancang
Desember iku ngepasi
de warsanira
sanglas wolulukur nggih
3. Kridhanira para wanita semana
tuhu ngedab-edabi
yekti tan kasoran
kalamun anakarya
lan para priya puniki
cukat trengginas
datan anguciwani
4. Saliyane berjuang nggayuh mardika
Indonesia puniki
Pra wanita nyata
Ndarbeni jejibahan
Kang tuhu dahat wigati
Minangka biyang
Nggulawenthah mring siwi
5. Datan entheng jejibahan kang den sandhang
para ibu kaeksi
leladi kluwarga
nggulawenthah myang putra
wiwit byar tumeka ratri
datanpa kendhat
eklas dipun lampahi
6. Dumdose generasi kang jempolan
saking astaning wibi
kang siyaga nggantya
para wredha utama
ing kang yuswanya wus lingsir
tan bisa selak
kedah dipun lampahi
7. Pramilane aywa sira padha lirwa
urmat lan ngaji aji
klawan bekti setya
marang ngarsaning biyang
lamun sira padha wani
mring ibunira
nampa benduning gusti
8. Aneng wekdal kang dahat sae punika
kang tansah denpengeti
ajeg saben warsa
iku mangka panglimbang
tekan sepira sayekti
sira tumindak
setya bekti mring wibi

B a w a : Sekar Tengahan Kenya Kediri Slendro Sanga

Keparenga kula matur ngarsanipun,
 Para rawuh kakung putri,
 Mangga sareng mahargya tingalanipun,
 Kalih likur Desember nuju ri-Ibu,
 Mangga sami sesarengan hanyenyuwun,

Jineman : Organisasi Wanita,
 Hari Ibu den pengeti,
 Nggenira label labuh,
 Cinaket Hyang Maha Suci.

Ompak-ompak : Para kadang ayo bebarengan nembang,
 Urip susah poma aja sangga uwang,
 Hayo nyadhong mring Gusti sarta tumandang,
 Amrih padhang dilipur sarana nembang.

Kinanthi Subakastawa :

- | | |
|--|---|
| <p>1. Mula buka Hari Ibu,
 Kumpulane para putri;
 Organisasi Wanita,
 Sa-Indonesia Negari,
 Mapan wonten Yogyakarta,
 Memayu harjaning Nagri.</p> | <p>3. Kula ndika kaum Ibu,
 Duta kusumaning nagri,
 Nglenggana mring kewajiban,
 Den labuhi tohing pati,
 Gumregah saeka praya,
 Nindakken wajib lan bekti.</p> |
| <p>2. Siji sanga loro wolu, (1928)
 Rolikur Desember nguni,
 Sangang dasa enem warsa,
 Ngrungkebi Ibu Pertiwi,
 mBudi mulyaning Negara,
 Kang pantes tinulad sami.</p> | <p>4. Indonesia para Ibu,
 Wanita ingkang sejati,
 Among, asih, asuh, asah,
 Dadiya titah utami,
 Terus maju tindakira,
 Mbangun Bangsa lan Negari.</p> |

RANGU – RANGU

Para kadang samya eling
 Marang lelabuhan pra ibu puniki,
 Runa klawan ratri datan kari
 Leladi myang negari
 Bu pertiwi.

Gusti ingkang Maha Suci
 Mugi amaring nugraha sayekti
 Mring para rawuh ratri puniki
 Sutresna Jemuah Legi
 Lumeber ing kulawargi
 Tan kapiji.

PANGKUR PANUTUP GELAR MACAPAT JUMUAH LEGEN ING KEMANTREN UMBULHARJO

1. Purnaning gelar macapat,
Jemuah Legen wanci detuneki
Mangga enggal enggal dipuntutup,
Kanthi ngonjukken puja,
Puji sokur konjuk ngarsaning Hyang Agung,
Mangga kondur sowang-sowang,
Mring wisma paringing gusti .
2. Nyuwun gunging pangaksama ,
mring ngarsaning pra rawuh kakung putri
solah bawa kang tan sarju,
lan sisiping wacana,
mangga sesarengan sami anyenyuwun,
ing Ngarsa dalem Pangeran,
mugi winantu basuki,
3. Tinebihna ing rubeda,
bidhalipun saking papan punika,
mugi Gusti Maha Agung,
peparing pengayoman,
dhateng amba saha andika sadarum,
wilujeng dumugi wisma,
pinaggih myang kulawargi